

嘉業堂
叢書

張說之文集



第四册

張說之文集卷第十九

碑銘

崔君神道碑

馬府君碑

貞節君碣

元公碣銘

平偃師碑尾

龍興寺碑

大通禪師碑

⑤識闍梨廬墓碑

唐故瀛州河閒丞崔君神道碑

蛟龍蟠乎沼無雲雨而不翔君子志於道無運命而不彰然則變化者是神靈之末富貴者非德行之本守其眞樂其分不其至矣世有人焉君諱漪字某博陵安平人在唐爲姜姓炎帝之孫也在周爲崔氏齊侯之⑤也

遙源長發洪河之水接於天層盤列秀太行之山拒於海東觀所以美其文宗北州所以貴其清族魏冀州刺史簡公諱纂君之高祖也齊散騎常侍諱觖君之曾祖也隋大理少卿諱世立君之大父也故祁陽令諱抗君之皇考也承百代之隆慶總五德之清道孝友忠肅宣慈恭儉好古博雅鄰幾亞聖盈而若虛漠而無象非夫入周公之廟升孔子之堂則憲章禮樂鮮得其門而覩矣弱冠以門胄入國學舉進士母弟汲亦以明經同年擢第大理卿張公文瓘人倫之表也目君曰昔兩劉並舉以爲騁二龍焉今兩崔齊飛可謂儀雙鳳矣搢紳景慕憧憧往來徙宅就居投刺成市若眾流之赴壑也及

親而仕盤桓利貞解褐澤州晉城尉降爲光州安樂尉
換蘄州黃梅尉轉河間丞凡更三尉佐四邑體公綽之
不欲勵伯夷之高操臨事以簡御人以寬雖爲小政必
有可觀故八使巡風再薦清白河上遺老江濱舊吏吟
詠餘聲祖述前事人到於今稱之若夫碧樹煙藹於江
潭紅荷藻耀於澤畔寶貝炯光於空浦美玉明潤於斷
岸不爲珍輿瑤輦之飾前殿後池之玩誠自得焉必將
有賞心之所歎也况乎殿邦光國之寶尊俎柱石之器
道爲帝王師言爲天下利已而稅遠駕於窮轍頓高才
於下位亦無惜焉固將有知音之所歎也垂拱元年奉
使上都邁疾終於時邕里之旅館享年六十有二夫人

河東裴氏湖州治中懷儉之孫滁州司馬昉之女也稟
訓華室作合高門嗣徽先姑克和娣婦德容之盛圖傳
罕有喪親過毀葬華朝落儀鳳中卒於鄭春秋二十有
八長安三年春二月合葬於金谷鄉邨山之陽禮也北
據高崗連隴南面大道禁林上國湟洲川原指掌仙門
宰樹碑闕相望之靈嘉之是安是宅嗣子曰用景龍中
爵安平縣子職兵部侍郎夙遭閔凶不承誨誘慎終追
遠克家用譽蒙聖主拔奇賞異絕等超倫三顧赤墀之
下一舉青雲之上祿廩所資吉蠲致美實先人宥十世
降百祥之所及也夫惟官不達者身不登乎明堂行不
夸者名不書乎史冊則韜光隱德之緒俾後代將何述

焉夫銘景鍾稱茂伐彼大夫之事篆豐石揚令名此孝
子之志辭曰

維嶽建國 厥生炎皇 維師尙父 諒彼武王

古人言曰 必齊之美 齊之丁公 後有崔子

因邑命族 世濟其美 黃鵠倚歌 雕龍擅史

倬哉嗣武 含章挺生 以蒙養正 用晦而明

混之不濁 人莫能名 學以崇道 文以慰志

垂其雲翼 坦然卑位 祿逮吾親 榮非我仕

皇皇上帝 建官惟賢 有人在下 胡雷捨旃

孰云輔德 曾不永年 展矣邦媛 宜其家室

友如樂諧 皎如月出 重壤既兆 終天偕畢

北陵墳邱 松檟千秋 金碑石樓 祇令人愁

東都城郭 通澗漣洛 飛橋連閣 金管迭作

人世之轉然兮 山川之宛然兮 德音之緬然兮

故洛陽尉贈朝散大夫馬府君碑

君諱某字某扶風人也其先伯益贊禹中衍御殿在周
曰羸在晉曰趙上卿以人歸政將軍以馬服爲姓緝熙
乎平通重合焜耀乎伏波中水我高祖汾州刺史諱歸
歡我大父鷹揚郎將諱士幹嚴考獲嘉令諱果濟美惟
舊寘德於君君幼而瓌奇長有規操樂道稽古升堂觀
奧伯父匡武撫之曰亢宗保家吾有望爾悉以先人家
謀圖傳付之入太學舉明經補巴西尉內憂去職君四

歲而孤重集於蓼因心孺慕名教同傷歸次葭萌江溢
毀道攀轎號慟濤爲之卻蜚人哀之葺棧而濟釋服調
襄陽尉主進魚家絕蠶食州將魯王俾盤二百魚時其
亡也遺之夫人以辭君還拜受使復王曰非唯是夫又
亦賢婦吾嘗其一得其二善焉長史盧幼孫悅是獎也
舉君清幹有聞授清城尉未往且有後命爲河西營田
判官物土穡人藁穀洋羨皇揆其懋考績登焉程務挺
之軍靈夏也咨君運籌乘遞入幕獲虜數百欲剽罄之
君諫曰王者之師將德是以討叛惟武攜遠在寬搏牛
之蚩不可破蝨未擒伏念何逞纍囚乃止師歸策勳上
柱國改温縣尉永_信阻飢廣提中外絕甘分少約己周

人既喪好迷室無嬖御夫人張氏詹事丞師寂之女也
敬事皇姑能佐君子娠有胎教宗如樂諧前誌之美多
所闕載絳郡夫人王氏則天聖后姑之女子而夫人之
母也嘗曰婦則女訓吾女有焉享年不永_玄髮徂落時
君之伯姊歸宗夫人推居廨寢事之而躬處下室及亡
設几筵於正寢惟明靈以女公之故憑巫通夢屢寢爲
辭舉家懇啟久而後定嘻生則盡禮死而知讓殆其神
不昧乎溫秩滿轉洛陽尉當周之興也版都社澤郊廟
倅紛嶽僎明堂京穀回回日不暇給又敕君專總徒匠
凡三百有餘旬蘊勞成疾眊憂損壽永昌元年孟夏辛
卯卒官春秋五十有七帝用悼之贈朝散大夫旌淑紀

庸禮也龜玉在山泉爲國寶以其靈與瑞君子居下位而上達以其名與義夫是之寵有由也哉葭萌之戚昭其孝也揚侯息浪異類胥感襄陽之饋識其潔也德刑於家聲聞於外塞垣之讜植其仁也眾俘賴全將不爲暴重屋之役底其勤也沒而益榮朝不棄力有一於此猶爲令德况備舉乎豈惟其身將施其後厥子構據擇皆國之良也爲有後之其在是乎徵構職太子僕景龍初宰長安永惟考龔朱芾己佩蔥珩母氏早逝而榮不及乃讓賜階乞封先妣天子憐之制贈夫人清河縣太君人謂長安能報恩矣詩云欲報之德昊天罔極報恩之謂也馬氏之墓世在扶風清河之喪也卜宅於洛陽

邛山麓後君捐館因窆其所夫人穴於兆之甲大夫窆
於域之庚今龍集戊申將返葬故國君執友禮部侍郎
嚴善思諡之曰夫子之逝一終八辰精氣其存親壤石
矣吾嘗相二工從新其愈乎且不戀本達不合葬古神
尚休無或變有夢先君者與其言叶於是祇率嘉話卽
安成規堙雙墳溝四壑傍建祠宇前勒豐碑茫茫天地
永懷長畢誰居後之人匪唯是四時蒸薦之事所以觀
百代祖宗之烈其詞曰

昂昂大夫 有邈其致 洽聞膚敏 賙窮錫類

孝實迴川 清能改位 佐邑惟五 安人則四

多稼穰邊 昌言扈帥 比義后稷 勤官沒地

獻歆天朝 毳衣以遂 我有合德 追啟清河

宜家族採 主祭神和 親戚光貴 劍蓋金歌

相從先後 樂此山河

貞節君碣

神功元年十月乙丑陽鴻卒於雩都縣友人沛國朱敬則清河孟乾祚范陽盧禹等哀鴻抱德沒地繼體未識考行定諡葬於舊域鴻字季翔平恩人也其先著族右北平郡大父眞陽宰適茲樂土爰定我居維桑與梓旣重世矣鴻倜儻奇傑瓌璋博達貫涉六籍百家之言其要在霸王大略奇正大旨君親大義忠孝大節而已章句之徒不之視也嘗陋漢史地理志周禮職方志時異

虛記心不厭焉乃攀恆岱浮洞庭窺河源踐岷衡稽四海之風俗算九州之險易與趙國貫高圖獻其議遇火焚盪天下壯其志而痛其事養徒閭里不應賓辟儀鳳中河北大使薛公舉鴻行勵貪鄙天子嘉之用寘于吏乃尉汲曲阿主簿龍門雩都夫其屏居十年一方化德厯佐四邑諸侯觀政惜乎有大才無貴仕命也初鴻遊太學有書生山東李思言物故南館鴻傷其終遠家屬有喪無主乃躬駕柩車送歸東土及在曲阿敬業作難潤州藉鴻得人厯旬堅守城既陷而猶鬪力雖屈而蹈節寇義而脫之因僞加朝散大夫卽署曲阿令鴻貞而不諛詭應求伸旣入邑則焚服闔門而設拒矣故得殿

邦奮旅一境賴存淮海底績答勳效功卒不言賞賞亦不及君子以爲急友成哀高義也臨危抗節秉禮也矯寇違禍明智也保邑匿勳近仁也義以利物智以周身禮以和眾仁以安人道有五常鴻擅其四武有七德鴻秉其二大慮克就之謂貞好廉自克之謂節粵若夫子可諡爲貞節也已於是紀名垂迹表墓勒石其詞曰

倬良士 縱自天 辨方物 覈山川 厥志大哉

峻剛節 殷義聲 返旅櫬 晏窮城 厥德邁哉

哀斯人 命莫贖 德不朽 溫如玉 軌來世哉

唐故處士河南元公之碣銘

其字子將作少西行沖撰

嗟我處士 煥炳其文 精微天象 與道爲鄰

頽乎萬化 於三十春 在昔薄葬 時服幅巾
厥孤克孝 永懷遷神 君其心之 無違返眞
乃建豐碣 追揚茂塵 王門公路 豈微朱輪
天才海學 於何窶貧 心焉有主 孰知我艱
烈烈皇考 求仁得仁 哀哀王母 斯恩斯勤
李虔報養 王褒感親 退居更命 喪禮終身
忠爲令德 孝實至純 一門二善 千載不泯

平僊師碑尾

粵以長壽二年十月十七日改窆於衛縣苑樓之西北
原夫令德所庥餘慶末也神龍紀[○]皇運中興天子嚴
祀清廟緬懷前哲乃下制曰朝議大夫守衛王府司馬

上柱國平元育父故偃師令某公門襲慶士林成則名
教羽儀道德泉藪輔仁宜國早謝昌辰積善洋溢垂休
茂脩時光祀夏慶屬配天錫類之恩俾覃於卿士哀榮
之典宜旌於泉路可贈蒲州長史君子謂成其子而植
乎身義方也愛其臣而及其祖孝理也孝以行惠惠以
察忠義以立慈慈以昭順君臣父子於是型焉

唐陳州龍興寺碑

觀夫廣大無相者虛空也四輪倚之而住精微無體者
佛性也萬法因之以生聖人有以見三界成壞皆有爲
殼故剖之以戒觜聖人有以見六趣輪迴是無明網故
決之以定力爍寶光之慧炬而沛善利之慈舟返迷路

率於中道猗橫流登於彼岸以言乎眞實之要總攝一
乘以言乎天地之間曲成萬物大矣哉道心包舉等太
虛而無際法教流通彌曠劫而常在則有乘如來方便
出應化門用大士因緣處帝王位俾庶類咸若謂之光
宅天下令眾生修善名爲莊嚴佛國龍興寺者皇帝卽
位之歲溥天之所置也唐祚中微周德更盛厯載十六
姦臣擅命伯明氏有盜國之心一闡提有害聖之迹皇
上操北斗起東朝排闥闔運扶搖張目而叱之殷乎若
震雷發地歛虢翕響以克彼二凶赫然若太陽昇天晞
照仰象以復我萬邦返元后傳國之璽受光武登壇之
玉尊祖繼宗郊天祀地之禮旣洎修舊布新改物班瑞

之典又備乃考出世之法鼓大雄之事入無功用之品
住不思議之方一光所燭庶兆爲之清涼一音所宣大
千爲之振動雲蒸風靡不崇朝而壞衣涌塔徧天下矣
陳州者上古太皞之墟近代睢陽之地置守則列爲郡
封王則建爲國本其風俗豪侈靡麗舊矣翻東門之下
接袂成帷觴宛邱之上炫服成市信豫章之郊一都會
也刺史南陽韓府君名琦其爲邦也勝殘去殺聖主之
得賢臣別駕彭城郡王名隆業其從政也能肅而恭高
陽之有才子長史南陽張齊賢儒林之選也司馬河南
雲盈公族之良也士曹從事八人錄事參軍于璆爲稱
首六屬官人二十五人宛邱縣令崔脩已爲稱首或以

藝榮或以門進高車一轍美利同人禮舉刑清於是乎
在因邦甸積稔之蓄偶日月再旦之初欽若王言建立
靈寺上略其趾下務其終百工不勸而亟庶役不徵而
會經始如雲成之不日夫其帶四郭五衢之陌踞重墉
闌闐之端福地砥平長垣雲矗高門有闕大廈斯飛連
廊曲閣交軒對雷木磨而不雕土塗而不飾壯無僭侈
以約費爲功儉無偏陋以淨居爲寶法王宮殿近寶花
之城菩薩伽藍住金燈之地亦猶是也上座處_(玄)寺主
眞度維那守慎等戒珠如月獨潔麒麟之行法寶如山
普聞師子之吼克諧善眾底定神居甘露飽而滿盈天
香醉而圍繞於時陳項之老褰衣而博帶皤皤然相造

而諏曰久矣吾黨之惑也倥侗顛蒙情嗜橫放恚愛我
僕聰明不開日有忘其生月無覺其滅滅一息之漏
可勝言哉而今舉足至於道場申臂及於淨土晝則目
禪誦之事夜則耳鐘梵之音何悟是生晚臻斯樂豈不
思天子之至仁乎惻下仁之昏墊適上聖之昭軌假有
相之途詣無生之理灑冥澤於已滅蒂玄根於未始百
靈之所歸依萬宇之所欣喜非獨陳而已矣蓋神闢天
聖開地世之祖也纂帝寶基皇統孝之主也殄僑狂破
魔孽威無外也廣正典紹度門德無大也通幽洞明兼
麤該精滂洋而行混濩厥成一收功而四善舉一推心
而羣願立咨如是則龍興之化曷有量矣夫業可大而

蕪沒焉不貽於後事可尊而苞蘊焉不述於世臣子之
罪也敢請圖之然言語之不到者心識心識之不到者
眞如二乘聞之而不見十地見之而未了而我云何能
知能說竊比六時之烏七寶之樹是出乎和雅音聲是
讚乎微妙功德記其在處長者之金園銘其事因育王
之石柱其詞曰

聖皇在上於昭於天唐雖舊邦其命惟新龍興返政滅
二暴臣少康非儼於舜爲鄰皇王蒸哉

其一

於廓_(玄)教生人戶牖神化洒心小大稽首掌擎萬域潛
移仁壽三代之前蓋未曾有最上乘哉

其二

泐泐陳服韓侯道之奕奕寶坊邦人造之天龍護持賢
聖熙熙受福維祺帝心則怡至理興哉

其三

唐國師玉泉寺大通禪師碑

譔夫總四大者成乎身矣立萬法者主乎心矣身是虛
哉卽身見空始同妙用心非實也觀心若幻乃等真如
名數入焉妙本乖言說出焉真宗隱故如來有意傳要
道力持至德萬劫而遙付法印一念而頓受佛身誰其
⑤之實大通禪師其人也禪師尊稱大通諱神秀本姓
李陳留尉氏人心洞九漏懸解先覺身長八尺秀眉大

耳應王伯之象合聖賢之度少爲諸生遊問江表老莊
⑤旨書易大義三乘經論四分律儀說通訓詰音參吳
晉爛乎如龔孔翠玲然如振金玉旣而獨鑒潛發多聞
旁施逮知天命之年自拔人間之世企問蘄州有忍禪
師禪門之法⑥也自菩提達摩天竺東來以法傳惠可
可傳僧璨璨傳道信信傳⑦忍繼明重跡相承五光乃
不遠遐阻翻飛謁詣虛受與沃心懸會高悟與眞乘同
澈盡捐妄識湛見本心住寂滅境行無是處有師而成
卽然燈佛所無依而說是空王法門服勤六年不捨晝
夜大師歎曰東山之法盡在秀矣命之洗足引之並坐
於是涕辭而去退藏於密儀鳳中始隸玉泉名在僧錄

寺東七里地坦山雄目之曰此止楞伽孤峯度門蘭若
蔭松藉草吾將老焉雲從龍風從虎大道出賢人觀岐
陽之地就去成都華陰之山學來如市未云多也後進
得以拂三有超四禪昇堂七十味道三千不是過也爾
其開法大略則專念以息想極力以攝心其入也品均
凡聖其到也行無前後趣定之前萬緣盡閉發慧之後
一切皆如特奉楞伽遞爲心要過此以往未之或知久
視年禪師春秋高矣詔請而來跣坐觀君肩輿上殿屈
萬乘而稽首洒九重而宴居傳聖道者不北面有盛德
者無臣禮遂推爲兩京法主三帝國師仰佛日之再中
慶優曇之一現然處都邑婉其祕旨每帝王分座后妃

臨席鵝鷺四市龍象三繞時熾炭待礦故對燬而心降
時診飢投味故告約而義領一雨溥霑於眾緣萬籟各
吹於本分非夫安住無畏應變無方者孰能焉爾乎聖
敬日崇朝恩代積當陽初會之所置寺曰度門尉氏先
人之宅置寺曰報恩軾閭名卿比德非儼局猷誼輦長
懷虛壑累乞還山既聽中駐久矣衰憊無他患苦魄散
神全形遺力謝神龍二年二月廿八日夜中顧命扶坐
泊如化滅禪師武德八年乙酉受具於天宮至是年丙
午復終於此寺蓋僧臘八十矣生於隨末百有餘年未
嘗自言故人莫審其數也三界火心四部冰背檠崩梁
壞雷慟雨泣凡諸寶身生是金口故其喪也如執親焉

詔使弔哀侯王歸贈三月二日冊諡大通展飾終之義禮也時厥五日假安闕塞緩反葬之期懷也宸駕臨訣至午橋王公悲送至伊水羽儀陳設至山龕仲秋既望還詔乃下帝諾先許冥遂宿心太常卿鼓吹導引城門郎護監喪葬是日天子出龍門泣金櫬登高停蹕目盡迴輿自伊及江扶道哀候幡花百輦香雲千里維十月哉生魄卽舊居後岡安神起塔國口錢飾賜逾百萬巨鍾是先帝所鑄羣經是後皇所錫金榜御題華幡內造塔寺尊重遠稱標絕初禪師形解東洛相見南荆白氣積晦於禪山素蓮寄生於坐樹則雙林變色泗水逆流至人違代同符異感百日卒哭也在龍花寺設大會八

于人度二七人二祥練縞也咸就西明道場如前曾時
萬迴菩薩乞施後宮寶衣盈箱珍價敵國親舉寵費侑
供巡香其廣福博因存沒如此日月逾邁榮落相推於
戲法子永戀宗極痛慈舟之遽失恨涌塔之遲開石城
之歎也不孤廬山之碑焉可作竊比子貢之論夫子也
生於天地不知天地之高厚飲於江海不知江海之廣
深強名無迹以慰其心銘曰

額珠內隱 匪指莫效 心鏡外塵 匪磨莫照

海藏安靜 風識牽樂 不入度門 孰探法要

倬哉禪伯 獨立天下 功收密詣 解卻名假

詣無所得 解亦都捨 月影空如 現於悟者

無量善眾 爲父爲師 露清熱惱 光射昏疑
冀將住世 萬壽無期 奈何過隙 一朝去之
嗟我門人 憂心斷續 進憶瞻仰 退思付囑
盡不離定 空非滅覺 念茲在茲 敢告無學

⑤識闍梨廬墓碑

夫孝者法象乎天地感通乎鬼神故愛敬之中又有眞
報哀戚之外更追冥福⑥識禪師其人也厥姓桑氏其
先長樂人漢尙書洪之後曾祖梁州刺史諱千秋祖貴
鄉令諱信考文林郎名爽自前代無違德基於累仁是
生達者禪師智周萬物而理證本無願度四生而見滅
諸有以爲空不離色體念子之慈業不忘緣起思親之

孝乃於萬山北陌滎陽東原葬先考文林府君先妣王氏負土成墳結廬其域置義井取施無求報鑄洪鐘取聞而悟道脩古寺造尊容取觀相生信若夫信生攝攝生靜靜生定定生慧於生滅處得常住心於虛空中立一切法其定慧之門乎禪師昔宴坐介山羣虎自擾今經行宰樹四眾依德至人凝寂雖罕見全象識者餘論亦時存一隅篆美豐石寄詞短偈云爾

邈矣上德

行密道高

哀哀父母

生我劬勞

禪心護念

神足遊遨

苦河雖廣

曾不容舫

甘井既涿

利物無竭

不增不減

不流不滯

仁靜而鑒

智動而悅

華鐘既鏗

雄雄法聲

如來如去 如滅如生 不有奚得 不爲胡成
寶地嚴飾 金山晃耀 善惡無門 惟人所召
境因心起 理憑思照 懿哉一心 混成眾妙

張說之文集卷第十九

ASTM

1148

張說之文集卷第二十

碑銘

刺史先府君碑

府君墓志

元君石柱銘

元府君墓志銘

張府君墓志

處士張府君墓志

唐贈丹州刺史先府君碑

府君諱騰字成隲范陽方城人也張祖曰揮帝軒之胤
肇勳茲木錫姓上矣詩有卿士孝友史有留侯世家八
葉至東漢司空皓公子字北平太守始居范陽四葉至
西晉司空華公子驥散騎常侍乃僑江左昆孫太常復
歸河洛故河東有司空砮洛陽有散騎里後司空至府

君十二代不失仁義矣王父諱弋周通道館學士考諱
恪無祿早世府君熒生遺育四代單緒家世尙儒不及
伯魚之訓外祖爲理遂讀皋陶之書以明法厯饒陽長
子二尉介休主簿洪洞丞以所願乎下事乎上以所願
乎上交乎下反身與人何往不順臺選貞白覆囚山南
人謂是行有典刑矣昊天不弔年五十二調露元年十
二月乙卯捐背於縣廨夫人長樂縣太君馮氏父威藍
田丞敬修法度踐涉圖史顧復幼孤將就成立家道不
殞夫人是賴享年七十二傾背於東都康俗里第光珪
說不天夙遭閔凶又集荼蓼先王制禮不敢從滅以景
龍二年七月己酉安厝於萬安山陽耐從周制也惟先

君不祿俸不奉親不機杼不資身僚舊無雞黍之接况
其非類乎族姻無魚菽之受况其人吏乎是全其高而
善其獨也過四十始閱六籍觀詩得之厚觀書得之恆
觀樂得之和觀禮得之別觀春秋得之正觀易得之元
曰君子多乎哉事斯一言而已矣每誦道記三復三寶
曰至人之心有以垂世又聞之太夫人云吾有子五十
載非其疾無一日之憂太夫人亦云吾事夫子三十年
耳無忤聲目無暴色先君之違世也其憂戀者尊門在
殯歟聖善在堂歟我諸孤無日敢忘及王母終養二祖
封崇亦尙克家成遺訓矣若夫安親孝也宜家義也翼
子慈也軌迹隱乎含光故當代罕耀馨香發乎潛德故

明神終勞先大夫久而益榮沒而不朽蓋此景雲二年
天子嘉侍臣之匪躬念前人之蘊德二月乙巳詔曰故
官某毓德高邁藏器下僚代載儒雅家傳清白河東佐
邑長不欺之風山南覆囚溢無冤之聽徂謝永久邱墳
不飾啟茲令身貞事先朝宜崇追遠之恩以表揚名之
志可贈使持節丹州刺史王澤漏乎泉壤國禮崇乎宗
廟漢帝論士恨不見李牧之爲人曾子思親泣無逮楚
王之厚祿道存運往痛矣餘悲緬尋前哲之所以聞無
聲於四海視不見於百代者匪銘頌歎桓麟蔡邕其則
不遠嗚呼霜露交積松檟滋深兄弟永懷相願將老胡
伯虎豈敢掩大人之清陳季方何足知家君之德小子

銜恤非曰能文莫假辭於他者務傳信於我也銘曰

猗嚴考

用^玄妙

體太和

揭高志

貞夫一

戒其多

孝于親

正于家

刑于訓

清厥心

晦厥迹

畏厥聞

寶如何其

謙儉孝慈

皇哉褒德

永世有詞

府君墓志

府君諱騰字成騰姓張氏其先晉人也晉分家世相韓韓滅留侯爲漢謀主至宇爲范陽太守因居其郡及華博物亞聖爲晉司空君司空十二代孫也曾祖諱俊河東從事大父諱弋字嵩之通道館學士考諱恪未仕卽世先君四代早孤單門煢立宗祀之不絕如綫府君襁

祿衰麻鞠育舅氏而炳太和之純嘏燦遠慶之洪膺庇
身禮樂發言忠信小無不誠大無不愼終日乾乾遠乎
悔恡靈根顛而還植祖德墜而復振加以好學不倦聞
一反三道機_玄鍵罔不幽探外王父大理丞某重世爲
士君傳其憲章博施精理年十九明法擢第解褐饒陽
尉丁王母憂去職夫人少而守義老而無子因心創巨
事不忍言喪紀之數加人一等服常調長子尉換介休
主簿洪洞丞太夫人在堂官求便近故累徙而不進也
內清淨以化人外平反以悅親不樂歸美而善隱德故
下車無赫赫之聲所去有遺愛之戀有命差覆囚山南
輶軒所歷全濟甚眾君以律有違經背禮著妨難十九

篇書奏帝下有司而刪定之官黨同妒異竟寢其議道
之將廢也歟命也臧倉其如命何調露元年秋奉使晉
陽遇疾輦歸藥禱無降冬十二月大漸九日乙卯棄背
於縣解春秋五十有二光珪說不天總角在疚明年春
奉輅殯於河東賴夫人撫養孤藐躬加訓授男習文
雅女工組繡姻不失親官復其舊景龍元年秋封長樂
縣太君夫人故藍田丞威之女也享年七十有二是歲
十一月戊申傾背於東都康俗里第於戲哀哉靡瞻靡
依何怙何恃二年七月己酉克葬我先公夫人合祔焉
從周制也初議葬小子夢度景於萬安山南孤堆東峯
之下時淮南弘公相地曰是山爲華蓋崗爲蟠龍龍者

大人之德孤者王侯之稱卜夢協兆何善如之乃定墳
塋卹宅茲所小子銜恤志之幽礎係曰

欽若古訓 時惟皇考 翁和三光 希聖二老

清有世業 儉爲身寶 彌綸典憲 思緝王道

佐彼四邑 人用不擾 生我曷後 棄我曷早

閔余髻髮 遭家不造 鳴鳩在桑 其子在棘

母氏聖善 示我顯德 命服天朝 封邑舊國

榮未卒歲 哀已帀域 泣血思親 昊天罔極

孤之華蓋 土龍蟠 連崗四繞 帶林巒 朝日吐耀

遠峯攢 微風夕發 過蕙蘭 石室固護 泉火寒

眾靈幽謁 奉神歡 壽宮深靜 永閑安

唐故涼州長史元君石柱銘

并序

公諱仁惠字某河南洛陽人也昔帝軒命子爰宅幽都
天祚降祚遂荒北嶽其後日月運行雲雷經始壇場鄴
洛據天地之圖帶礪山河建王侯之國公魏昭成皇帝
之十世孫中書令濮陽王順之曾孫也大父雄魏濮陽
王改封武陵王毘吾伯嗣越在濮陽之墟琅瑯王子別
封武陵之郡宇文朝降爲武陵公太府卿秦州總管微
子去國不替舊章薛侯來朝於焉降等父胄隋濠豫二
州刺史右衛大將軍襲封武陵公翼亮隋室宏濟王基
有佐命之元勳承異朝之世祿文武籍甚貽燕深長公
受金行之正性承冠世之隆烈幼見岐嶷夙聞聲器靈

結一廬朱氏賸餘叢書

臺雲秀繩墨之宰無施雅韻天成金石之師何力屬隋
網弛紊神棄不歆卿族衣冠日失其序獨寐寤宿永懷
盤澗之人藏器待時未射高墉之隼唐高祖龍飛天宇
鶴版巖林授公右千牛錄事黷閑之恩舊也高皇邑子
既與盧綰同衣世祖學徒則有嚴陵其宿久之以公事
免爲雋州法曹又歷循州河源滑州靈昌二縣令克己
爲政蠻貊化忠信之言直道與人仕已無喜愠之色永
徽在麻石眞構難羣兇既翦江界蕭條帝念疲屯疇茲
俾父乃授睦州雉山縣令乘駟而往下車作則江通海
盜革面來威然後開網鳩人峻策羈吏閑田盡闢鰥寡
委犬彘之餘絕澗無遊豪猾屏蠶漁之氣我有禮樂達

於山川鬼神物應休禎孚於鳥獸草木朝廷異之拜朝
散大夫行隆州閬中令未至改授雍州渭南令觀人設
教異邑同風遷隆州司馬尋加朝請大夫守涼州都督
府長史分乘兩蕃人康頌作化澄巴濮無侵橘柚之園
教溢河湟不飲蒲萄之酒離歌就昃歲夢臨辰命蹟脩
途榮慚厚德總章二年終於官舍春秋七十有三夫人
安定梁氏文伯之妻君子以爲知禮孟軻之母良史述
其能賢齊德茂於昭塗合祔期於幽隧有子懷貞斧藻
詩禮佩踐義方承家有馥芝蘭如也歷官右司員外郎
太子舍人而罹事徙居復歸舊土履霜露於三紀無改
素冠之行違桑梓於十載還守青門之田勤孝在乎道

遠豐感思乎備物武陵公之塋域今順陵柏城之內也
山園有禁奉瞻靡及粵以聖祿二年歲次月朔別卜宅
於咸陽縣肺浮原合葬焉公孝友純深風標峻起門無
雜客家有嚴君而佐郡爲邦引風邁德執法不撓去邪
勿疑仲由之政事叔向之遺直豈稱論之典有關範則
之容將墜仰惟代姻恭承哀託郭有道之故事無媿蔡
邕趙文子之將遊永懷隨會寓詞楹石式題賢壟其銘
曰

大哉乾元 我族資始 有國伊魏 曰天之子

皇義姓風 帝姬氏水 勅業垂統 鬱乎舊史

崇德象賢 允也重軌 貞涵玉性 潤結珽源

武公之子 平王之孫 川流長直 光氣熊渾

孝深柏穎 義重荆潘 白珪比節 黃金敵言

行實剛簡 遊無諂黷 學妙神教 書能鬼哭

避彼屯運 盤桓空谷 四海有王 一旦明目

佩此芳草 遷於喬木 亦既從政 淑問克宣

秉心如水 臨事如弦 歷宰四邑 高芬屬天

元僚兩郡 汪化流泉 江河秦蜀 嘉聲在焉

三光西沒 百川東度 天道運迴 人隨代故

倏忽三紀 悲涼千露 帝葬橋山 傍塲祖墓

天斷舊城 地開新路 路卽咸陽 阡惟京兆

地氣雲矗 長岡龍抱 竈拵銅人 瑩留石鳥

塵歇徑滅 山飛海少 篆刻揚石 亭亭華表

唐故左庶子贈幽州都督元府君墓志銘

維開元十年正月己未左庶子武陵公河南元公薨於
東京留守之內館公諱景懷字某魏武陵王雄之曾孫
右衛大將軍胄之孫贈麟州刺史仁惠之季子昔天啟
水行君臨寰海雄圖長發本枝碩茂濟美象賢餘慶不
隕公受茲介祉誕膺淑靈幼有純至之節長立公直之
操學綜羣藝詞擅精微夫其結言以信導物以德清儉
足以軌俗貞厲足以矯邪故美暢於中名揚於外弱冠
以國子進士高第補相府典籤藩邸擇賢妙盡時選尋
以內憂去職重補相府參軍及明兩昇儲作貞萬國以

宮臣除太子通事舍人天授中以親累除名向逾一紀後除直羅溫縣二令雖大位未享通材必又初自太府主簿累入副卿河南掾曹克昇亞尹握蘭右轄綱紀南宮秉茲憲簡肅彼專席再侍儲華卒踐宮相執心好直履法斷恩觸雷霆而除惡不避也枉絲髮而干譽不爲也升降兩宮出入三代克慎其始終厥有成君子以爲難允哉其難矣及啟手歸全遺言薄葬家無長物士伏其清年過懸輿人傷其天鳴呼哀哉贈都督幽州諸軍事幽州刺史賻悼之節優於恆數明年二月歸葬於咸陽之舊塋夫人韋氏祔焉禮也夫人卽逍遙公敬遠之

⑤孫左常侍希仲之叔姊淑行無徵華年早世其孤彥

沖等克遵遺訓靡所寘哀說情睦外姻懷深國士旣闕
西階之奠遠投東武之詞銘曰

卓彼英運 慶靈旣長 貽訓夫子 體微知章

在藝斯博 於欲則少 徒文其中 莫飾其表

惟靜惟默 不激不矯 時經三代 官成兩宮

化若風偃 德如澤融 邦稱其直 朝喪其忠

禮祔周兆 墳瞻漢宮 哀哀純孝 長訴長穹

周故通道館學士張府君墓志

君諱弋字嵩之范陽方城人也其先張仲以孝友佐周
子孫醜周仕晉相韓至留侯報韓讎秦興劉滅項爲漢
世家九代及於漢亂居燕四葉爲晉司空混一天下司

空生禪避胡過江六世至太常而復寓於河東之族人
君卽太常卿隆之曾孫徵君子犯之孫河東從事俊之子
性倜儻尙氣節能引弓六鈞命中百步車服出入擬於
封君州里頗患之君迺勵操強學不出門者十餘年探
道覩奧鬱爲淵藪周武帝聞之徵爲通道館學士旣入
隋而面其國高尙厥志終於山廬嘗言夷齊清者非達
伯鸞曠者非中優哉游哉吾不與也夫人某氏少而嫠
居長而喪子流離世故窮盡艱危提攜女姓託身禪宇
實有高行之烈隱居之風未遑歸葬有志不就遺恨終
天降及曾孫追申情禮景龍三年歲次己酉十月十六
日克葬曾王父曾王母於河東之普救原成先志也銘

曰

皇矣烈祖 才雄氣武 不值漢高 空思萬戶
一旦折節 十年學古 高步華光 飛纓書府
昔有周處 斬蛟契虎 易暴以儒 異代同矩
周命既沒 鼎遷于隋 仕於二姓 君子不爲
昭昭盛德 百代之規

唐處士張府君墓志

府君諱恪其先晉人晉有張老韓有開地漢有留侯八
代孫皓爲司空司空子宇爲北平太守遭漢亂離家於
范陽至_(玄)孫華復爲晉司空遇難子孫南渡其處者或
寓於蒲坂周齊間有歸者因徙焉君晉司空十一代孫

也曾祖徵君諱子犯祖河東郡從事諱俊父通道館學士諱弋德音遺範詳諸家牒君孤紹單門傍無兄弟苗而不秀未仕而卒道未融於邦國位未揚於王庭故老之口浸遠好事之書又闕是後生不得預聞焉哀哉嗣子洪洞丞騰襁褓衰麻育於舅氏夫人隴西董氏常州長史雄之女也早年守義唯鞠一子嚴而有檢勤而善訓成先人之丕烈貽後嗣之積善微太夫人德則張氏幾將墜焉開耀元年十二月二十七日終於鄜城縣世婦馮氏之別業春秋七十有二先君之違世也太夫人在堂大門在殯日月逾邁有志未從是諸孫疾焉若履淵谷以景龍三年歲次己酉冬十月二十六日克葬王

父王母於蒲坂東司空之村成先志也銘曰

縣縣王父 續我靈基 幼而植德 人莫知之

烈烈王母 克明克類 教成鬻子 光我族嗣

中條之北 大河之東 邱陵桑梓 鬱鬱崇崇

千年啟室 百歲來同 永惟先志 欽成厥終

張說之文集卷第二十

張說之文集卷第二十一

碑

和麗妃神道碑

鄭公主神道碑

薛氏神道碑

鄭夫人神道碑

潁川夫人碑

昭容上官氏碑銘

和麗妃神道碑銘奉 敕撰

舊史云軒轅帝宮次星具黃龍之體郊媒神祀次妃成
⑤鳥之命非聖也莫能法天非天也莫能感聖則有相
乎坤而母乎震齊乎古而合乎天跡雖祕絕猶可測而
言焉麗妃趙氏天水人也麗者以華美爲貴妃者以配
合爲尊易云日月麗天傳稱星辰合度麗加妃號自我

爲初原夫八駿勤周肇有封姓三軍霸晉乃蕃卿族說
寶符而開國曳珠履而成家果驗成宣之後不乏文忠
之慶堯門昭殿何代無人暨乎紫氣上通瑤臺獨立楚
宮選美納良袂於神雲漢掖求才進團扇於明月故坐
而論教則位比三司動而具瞻則儀刑六列者矣先將
軍以恩澤授職太夫人以有禮封鄭流車躍馬豈無甲
觀之親湫宅閒門不有椒房之勢探風揆化憂國如家
故聖人有以尙其德也躬親繭館義形熊檻退席以愛
禮樛木以廣恩望古難臻之地必爲常踐之域故聖人
有以嘉其志也懸象告沴經時寢疾在蒙被之辰答還
輦之問生可捐於浮假心獨係於元貞神往上清願承

恩而入道形歸下土期去禮而薄葬慈顏同氣奚敢爲
言皇上閱而許之咨嗟不已開元十四年春秋三十有
四七月十四日薨於春華殿殯於龍興觀之精屋示以
出家從道例也命河南尹監護河南令副焉喪葬務約
成遺語也二十六日窆於故都之後邙山之陽孺慕承
華淒涼薄室列薤歌於東路迴容衛於北山壽堂一閉
兮凡聖等人代同悲兮脩短閒月帔雲衣襟以神仙之
服上房陶篋旋於造化之初此皆聖主之曲成賢妃之
本志何必雲陽山下別起通靈之臺未央宮中虛立致
神之帳若夫易名之典考行是存帝諡曰和禮之貴也
氣之和者生萬物聲之和者孕八音魂知後命感聖恩

乎有詔史臣恭銘內職事出彤管辭無華飾寫樂池之
永傷寄瑤山之罔極銘曰

帝妃佐后 實掌陰教 八月選才 千金聘貌

禮獻絲繭 詩脩澣濯 婦政可尊 嬪風須效

皎皎漢女 爲皇降靈 娥娥邦媛 順道之經

結以印綬 華光後庭 帶之弓韉 明潤前星

退述潛運 夙承嘉獎 謙苦中京 崎嶇上黨

金鏡間目 明珠耀掌 心方樂於時泰 魂往

悲於化往 紫雲衣兮霓裳 送美人兮北邙

白襄宮兮青松苑 去君恩兮日遠 秋風急兮

霜天 草木黃兮野田 滅香容於空櫛 留畫

像於甘泉 春秋以麗和之二字 獨褒美於千

年

鄆國長公主神道碑

臣聞堯有娥英致九族之敦序舜有霄燭動百里之光
耀大聖之後天必縱之積善之家神所慶矣豈惟上帝
之女雲漢爲靈平王之孫肅雍其德連華前志世有其
人皇唐鄆國長公主者睿宗之第七女也母曰崔貴妃
構累聖而成門合濟美而爲室蘊乾坤之純粹演日月
之清明神媛誕靈常言所絕免懷之歲天奪聖善不食
三日哀比成人文母流胎教之慈曾子得生知之孝由
是宮闈延矚邦國遠聞及乎玉笄輝首油駢在馭錫之

美地邑以荆山求之令族嬪于薛氏爾其居玩圖史動
修禮法服其澣濯恭儉之教興鼓其琴瑟敬讓之風被
其行己也安親惠下之謂仁敬宗合好之謂義降貴接
卑之謂禮恕情周物之謂智推心而行罔不該備其理
家也視膳饗餼之均和主饋醴醢之品齊絲竹五音之
徽靡纂組九華之縟麗經目所涉莫不精詣每至三元
上賀五日中午參進對詳華折旋舒婉故以式瞻貴里儀
範通門如千花之汎惠風百卉之涵膏露窈窕之儀克
舉蕃衍之福大來有男子四女子五瑤碧生階芝蘭滿
室也習禮明詩日漸庭闈之訓銀章艾綬地連恩澤之
輝自先朝徹辰之辰迄公主成笄之日外降過制內疾

餘哀手寫金字梵經三部躬繡綵綫佛像二鋪貝葉眞
偈現心相於銀鈎蓮花妙容呈意生於玉指孝思惟則
道遠乎哉開元繼明推恩由已進封鄆國長公主食邑
一千二百戶田賦廣而彌儉禮秩尊而益恭其後君子
晨歌夫人晝哭未亡爲稱生意盡矣撫視遺孤將守柏
舟之誓志期荆落永從禁苑之遊朝制斷恩改降鄭氏
陵谷可移隨和之德不昧寒暑有松筠之性如一均
養七子麻廕二宗汾陰之室忘亡勞陽之黨相慶旣而
善福虛應寢疾彌留盡國醫之伎遠一畢至供御府之
藥中使相望命之必至不可支也堂邑杯忽焉瘁色
平陽歌舞適足愁人開元十三年二月庚午薨於河南

縣之修業里春秋三十有七震悼紫庭哀傷朱邸傾家
若墜舉國同悲有詔光祿卿孟溫禮監護喪葬京兆尹
能廷休副焉窀穸之禮一如涼國公主故事夏四月恩
旨陪葬於橋陵不祔不從古之道也皇上念同氣之致
美感閼川之永謝恨棣華之半缺悲瑤草之先化乃命
國史昭銘懿迹降恩禮於雲露寫哀詞於金石水非湘
渚還起帝子之祠山是洛陽卽封天妹之冢銘曰

帝系白雲

仙源紫氣

張家成國

承天作貴

赫赫聖祖

曰文曰武

皇皇睿宗

一變萬邦

挺生淑媛

慈和孝恭

清曠如神

娥眉無雙

邸弟立官

湯沐建封

爰及笄總

禮施環珮

鳴鳳獻祥	乘龍擇對	帝唐降女	天乙歸妹
珠玉過庭	蘋蘩正內	蛟門早闔	龍湖忽上
無地何載	無天何仰	金殿書經	華絲繡像
欲報之德	昊天罔極	孰是言歸	良人永違
銀鑪煙斷	蘿幕霜飛	懇願毀形	說身壞衣
不諒人只	改嬪他士	稟命曰從	從人曰順
息媯繩楚	懷羸羈晉	反經合權	與道同韻
燠休二室	均權等潤	四海謚清	九族和平
萬物向榮	眾雛未成	心戀盛明	形隨落英
祖載鼎城	歸窆咸京	挽歌數聲	鹵簿凶行
哀哀聖情	惻惻同生	橋山片石	千秋令名

延州豆盧使君萬泉縣主薛氏神道碑

或稱達性命者齊生死之域違憂恡者一脩短之數斯蓋無心之論耳焉足與議於情哉何則雲虹滅影詞人於是詠謠華秀從風君子爲之歎息豈不以對仙麗之景懷變化而遺戀在韶蕊之節悼零落而偏憤吾見豆盧氏之子於其伉儷有焉縣主諱宇姓薛氏河東汾陰人大父駙馬都尉奉宸將軍諱瓘尙城陽公主考駙馬都尉散騎常侍諱紹尙鎮國太平公主其在昔也夏有車正先封周有薛侯爭長其在今也五宗姻於帝里重葉母於王姬河水經天上積星辰之氣霍山鎮地下多珠玉之林縣主幼而敏惠長而洵淑貞義孝烈之傳吉

凶賓祭之儀一聞成誦絃綖糾組之製涪苴醑羞之品
一見懸解至乃鶴迴清汎蠶聚崩雲月韻玫砧花穠綵
樹婦人能事咸臻妙焉大聖天后鍊石補天有王母之
神器分茅列土啟弄孫之美邑封猶有禮義引而親天
授三年四月內封萬泉縣主天愛下流日親上簡乘龍
之舉和鳳爲難絡八紘以選門奄千官而求俊夫以龍
圖帝寶祈步搖之華源虎戟侯門襲京燕之雄胄人之
信美帝用嘉焉以萬歲登封元年仲春旣望歸於豆盧
氏六官送行百僚供事迓以鸞輅遺以翟車環珮冕旒
璆然在馭黼藻朱黛爛其盈門詔婚之禮於焉爲盛爾
乃移其愛敬以事舅姑伸其友恭以諧公妹舉宗洽比

如鼓瑟琴每至婚姻會同少長咸集珩璜節步金翠耀
首有婉孌之心無驕矜之色晞晞唳者若遲日之映漣
漪瞻詞氣者猶光風之轉蕙加以引納懷和饋分周
振疏屬自附窮歸忘窘故蘭行彰信於閨門而蕙風滿
盈於邦國諒惟琬琰之性自美抑亦劬勞之訓致焉中
宗孝和皇帝雲迴南土龍見東京二儀更闢九族咸敘
望我兄兮公主贊陶鈞之力曰吾甥也縣主開井邑之
賦神龍元年春加實封三百戶縣主既通籍門闈奉御
又尙司殿省天子巡遊宮觀觴樂池臺我有周親無時
不從主家外幸比齊后而聯恩子婿中參與趙王而均
禮或醉飽踰度寒燠未平何嘗不御藥在門玉人接路

當時厚澤莫之尙也景龍四年二月以奉御出爲丹延
二州刺史保傅下堂隨朱幡而同去輜駟入郡與皐蓋
而齊飛辭宮闕而歲闌戀庭闈而日遠肥泉永歎衰氣
攻衷楚祝招而不來秦醫來而不及景雲元年八月二
十一日傾逝於延州之廨舍春秋二十有四美玉褫顏
明珠晦色平陽舊宇遂無望於歸甯懷縣新文空留連
於永逝有子三人西華南容東里等或齷或岐呱呱而
泣天何以罰神其忍之冬十有二月五日歸葬於長安
洪瀆原窀穸營護有命加等器服祖遣率由舊章生之
也榮葬之也禮若夫柔嘉好洽善之原也肅雍降貴謙
之道也山河其德容潤廣也熊羆其祥祚大也總眾

美於脩嫜馳落暉於小年此所以哀中之又哀也昔袁
亡馬氏蔡筆斯奮鄭喪曹姬潘文亦作矧茲內範事華
無媿砥望夫之石以表靈邱緝幼婦之詞將傳終古銘

曰

薛之皇祖 胄軒國禹 相殷侯周 氏其土宇

英英白雲 鬱彼河汾 公門蕃衍 銘鼎氛氲

則仁則義 則戚則勳 餘慶介祉 誕靈女士

中宗之甥 鎮國之子 皎如霜雪 華如桃李

舜族爰序 堯封咸秩 萬泉開源 三百其實

守盛以儉 居沖不溢 亦旣鳴鴈 宜爾家人

謙恭下下 撫納親親 傾財致客 對饁如賓

我有邸第 前臨黃道 我有池塘 卻望青草

漢輦停暮 秦簫拂早 歲月易忘 歡愉難保

良人出守 將命北徂 與子偕往 飲別東都

望母腸斷 辭家淚枯 露萎勁草 霜酸眾雛

魂兮何歸 京兆之野 葬於何處 杜陵之下

巖巖雙闕 列列行櫬 勒是德音 以觀來者

鄭國夫人神道碑奉 敕撰

鄭國夫人者弘農楊氏之女也開元神武皇帝惠妃之
母曾祖諱諶以禮樂習文爲越州司馬祖衍以折衝學
武爲游擊將軍父宏以門才入仕爲雍縣丞而早卒初
則天之代夫人言歸武氏曰恆安郡王生惠妃及家令

忠太子僕信開元十年三月終於通化里其四月卜宅于少陵原哀子銜恤號^〇仰訴怨報德之不待託思齊於永慕皇帝悒鸞殿之內憂悵鶴池之外慘揚淑聲而金石刻揭高行而天地感國史司文命爲鄭志若夫清明下濟嶽瀆上昇祥會德門慶育邦媛神授孝理之性天啟聰達之心加以潤澤詩書游玩圖傳伯宗好直預戒將亡重耳羈遊先稱必霸豈直漢庭章奏假借仲長之才周官禮儀咨稟宣文之學昌言嘉論有如此者螭首螭頰修眉橫波旣工頓笑易爲容止肅恭而不跼舒和而不倨商周革命遇屯有怡懌之顏桑霍儻予在貴無驕矜之色端容一貌有如此者絃綖祭服闕翟朝衣

纂組入神翦製驚國雕胡之餅露葵之羹五齊六清三
鬻七醢咸一見而洞理或不習而知和女工中饋有如
此者惠妃載誕皇子在者四人驪泉多龍丹穴皆鳳克
岐克疑預見元凱之才實覃實訃早聞霄燭之豔亦關
陰德之潛襲胎教之密傳乎又名子以義成家以禮忠
者以令德爲忠信者以不欺爲信傳云去食存信信而
有徵經云移孝爲忠孝則不匱周宗咸履紀季獨存至
德深圖有如此者辟司徒之妻邑其合禮南城侯之婦
封其舊功況夫慎徽四德四德咸舉經綸二儀二儀克
從匿武收繼趙之勳產姚承配夏之慶吹凱風於椒掖
外王母於梧宮盛德大業窮光極榮啟國西鄭不亦宜

乎十數年間二子榮立每至四時令節六參嘉會魚軒
照門龜艾交室爲壽則珠貝山積侑幣則錦綺霞飛白
玉滿堂聚姻親而同有黃金作穴散鄰里而無餘君子
欽其布義聖人嘉其實儉故寢疾則飲食天廚湯藥御
府匪日伊夕上宮絡繹於閨庭送終則威儀傾都車騎
曠日自宮徂野中使相望於道路哀榮之盛書記罕聞
猗歟所謂小君之遺美聖善之高烈者也如使後代考
南史議西陵披簡牘而歎息臨山原而茫昧旌賁之道
不其闕而然則外孫之碑武擔之石非明淑之壟其何
設焉辭成進御帝稱曰善願謂尙札我其書之於是灑
翰黃縑縷字青琬雲橫波蹙神變豔爛於山門鶴倚鸞

翔生氣宛延於松路禮尊事絕恩崇迹遠斯又(玄)德動
天幽誠迴日之奇致也誰昔未覩名言莫逮銘曰

代有母德 厥氏楊兮 祖考爲士 夫爲王兮

聖后中葉 總萬方兮 天命未改 復歸唐兮

賢淑啟祚 繼絕亡兮 宗周雖滅 神女昌兮

建號西鄭 榮舊鄉兮 魚軒翟蕩 盛寵光兮

二子雙飛 華綬章兮 出入輪奐 庭煒煌兮

去此昭昭 卽茫茫兮 何處詔葬 少陵阜兮

貴妃慈親 侯王舅兮 寒暑流易 山川久兮

古墳坡陁 老樹朽兮 壽宮靈慶 百代守兮

頌石光華 千載後兮

穎川郡太夫人陳氏神道碑

穎川郡太夫人者諱某字某雷州大首領陳玄之女羅
州大首領楊麻之妻驃騎大將軍兼左驍衛虢國公思
勗之母陳氏家富兵甲世莫嶠外夫人誕靈豪右淑問
幽閒六行天至不因師氏之學四德生知無待公宮之
教原夫陳本媯水楊承赤泉九貞爲郡良史出乎中國
五馬浮江僑人占乎南海兩州接畛二門齊望卜妻鳴
鳳擇對乘龍楊公有聘玉之祥應姬獲探金之慶虢公
弱冠昇仕鞠躬禁闕正性本乎胎教剛腸形乎義色神
龍三年六月五日北軍作難西華失守騎入宮壺兵纏
御樓公孤劔凌鋒羣凶奪氣倉卒之際安危是屬旣立

殊常之勳遂蒙超次之命授銀青光祿大夫上柱國
農郡公行內常侍其後改拜將軍太夫人是加爵邑高
堂九仞重祿萬鍾朝廷美其揚名州黨尊其遠聽夫人
富而好儉貴而能勤身卻錦繡手親紡績公每昏定晨
省夫人必誠之忠孝勤學文武嘗謂汝口稱思勗當心
念其義父母名之欲汝三思而勗勵也故號公便習于
戈漁獵書史致命伐罪擒叛獠於百越寫誠誓眾破狂
蠻於五溪鬪子弟如使手足請風雷若應期契聖朝答
高秩於驃騎酬大封於號畧豈非以辭第之懇忠成斷
織之明訓臣節立矣君恩厚矣子孝成矣母慈著矣備
此四者善孰加焉抑神道祐心而人倫興行詩曰母氏

聖善又曰宜爾子孫斯實潁川太君之有也享年若干
開元九年四月八日薨於長安之翊善里先公早世邱
墳故域古無合葬禮有從宜夫以體歸下地萬里豈殊
乎黃壤魂何不之雙棺幸同於(玄)室以其年十一月十
六日招魂祔葬於萬年縣龍首鄉神鹿里申孝子不忍
隔親之情也恩敕賜錢十萬絹布皆百段日礪忠厚漢
武知其母教馮勤寵貴世祖稱其母德克軫天情頗爲
連類號公生盡其禮沒盡其哀嗟閱水之日逝懼藏山
之夜徒追鏤碑板遠貽圖傳烝烝至意有足感人慳慳
信言故無媿色銘曰

陳公舜後

楊侯周裔

去國何人

南遷幾世

鄙淥嶂表 珠崖海際 兩族相京 財雄兵銳

猗歟邦媛 儷茲國士 友若琴瑟 華如桃李

心契法度 容和愠喜 資敬從夫 移忠訓子

嘉此令子 南溟北歸 于天鶴唳 拔瀚鴻飛

朱宮退敵 銅柱來威 國安家寵 魚軒翟衣

子封虢國 五公前宇 母邑潁川 三君舊土

感激榮慶 踟躕今古 高堂夜空 弔客朝聚

龍首山前 前臨灞川 招魂五嶺 合葬三泉

山山邱墓 樹樹風煙 孝碑不滅 茲墳永傳

昭容上官氏碑銘

齊公敘不錄

天降時雨 山川出雲 乃生靈媛 祚我聖君

精微其道 煥炳其文 三光錯行 昭容綱紀

百揆繁會 昭容條理 外圖邦政 內諭天子

憂在進賢 思求多士 忠孝心感 天焉報之

吉凶有數 邱焉禱之 如彼九日 羿焉暴之

如彼三良 秦焉悼之 漢宮選才 班氏其特

楚史書霸 樊妹之力 彀穆齊公 敘其明德

嗟爾彤管 是鑒是則

張說之文集卷第二十一

張說之文集卷第二十二

墓誌

逍遙公墓誌

陸君墓誌

張府君墓誌

馮潘州墓誌

葛君墓誌

尹先生墓誌

呂君墓誌

徐氏子墓誌

尹舍人墓誌

附子曲
阿令銘

崔訥妻劉氏墓誌

中書令逍遙公墓誌銘

唐故中書令逍遙公韋氏諱嗣立字延構京兆杜陵人也受渾元之正性挺生人之秀傑門爲孝悌之府世處台衡之地蓋士林之高標宗臣之首出者也生於秦之

清水長於鄭之成臯聰明先覺博古兼今究蓬山之百
氏綜闕里之六藝文而不華實而不滯原夫志在於易
行在於禮守橐籥之冲虛播朱絃之愷悌事有則而言
有度神無方而用無體其與人也溫良善誘仁恕多容
俾夫頑蔽開析復鷙擾從君子進道小人革慮聞者願
來見者忘去若膏澤之浸陽和之感萬物不知其化矣
及夫覆簣登朝濫觴宰邑聖朝知其周慎忠肅簡易循
良是以綢繆兩禁重疊千里迄踐宰衡終厥有成凡化
二邑理七郡三入中書再統兵部選兵吏各兩冬典樞
密共五載光弼四主厯政三十有餘其間累有傍及官
因左退日月蝕而更明隨和幽而不昧爾其爲邦設教

遵德閑邪身勤心苦誠感物化禮讓興於私室刑罰廢於公家衡鏡高懸文武矯首才無我失善若己有風流名教作法垂後訐謏皇極功格天地茫茫蠢蠢旣生旣遂四夷來王五靈皆至然而外榮中素迹邇心遐杳然朱戶之若喪邈矣赤松之可接西宴驪山之谷東息龍池之野擇逍遙而建號列土宇而開社卽明主封立帝之謀表高臣之志也公考侍中爲國元輔公兄承慶當代齊名咸以令德繼和金鼎扶陽二相陳氏三君復追美矣侍中前夫人崔氏生黃門而卽世後夫人王氏生公而偏愛公克諧以孝因心則友啟均養之德成無間之言天下之人比之祥覽惟公德行言語文學政事四

者實總而兼之事親養志而能爭居喪過哀而顧禮此善中之善者也善人天之經也國之寶也道將興廢木鐸之用有時命或推移蒼生之望恆在春秋六十邁疾陳郡還醫洛師開元七年九月二日薨于歸德里有詔贈兵部尚書諡曰某禮也明年某月某日葬於某地有子孚恆濟夫儼然在疚靡所寘哀以某忝縉雲之舊寮清風之餘論入難名之閩域窺妙德之形容見託銘誌庶傳精爽至於歷官次序平居事業當見郡府遺愛之碑國史名臣之傳故不存焉銘曰

峩峩仁公 抱孝含忠 文獻則足 高明有融

翻飛王佐 穆哉清風 道濟明時 心樂幽地

薛衣華袞 坦然一致 逍遙啟封 帶礪傳祀
生涯其盡 振古其常 人秉三德 天歸百祥
臧孫有後 公業不亡

岐州刺史平泉男陸君墓誌

開元十三年十一月六日故岐州刺史平泉男陸公卒
于京師十四年冬十月葬于鄴西之先塋公諱伯玉字
某河南人識真之士也夫譽其克家光乎觀國篤慈惠
以宰邑^①雅量以執憲擅華妙於禮闈敷文敏於禁掖
推直方以獨坐率易簡之專誠所居而美風振所蒞而
德聲溢非德充於內而美形於外者乎若夫孝盡愛敬
之衷悌包友順之節仁協返身之恕義適成物之和四

者禮之善物歟吾友嘗從事於斯矣然而舉禮之綱持
心之柄靜則樂先生之道動則濟賢人之業位不盈量
年無登壽之才也之命也復焉可得而言哉銘曰

陸侯泉妙

體曠心古

龍章炳文

鱗角藏武

橐籥沖用

詩書義府

移孝則忠

安親合主

乃建侯社

乃牧王畿

有嚴有翼

有長有威

汲直謝病

秦和不醫

乞言未老

啟手全歸

石鼓東臨

銅臺西望

別業宛在

舊塋增創

弱子攀車

孀妻送葬

風景飄忽

山川惆悵

令德可傳

浮生匪重

神去一息

形遺萬種

露往草陳

霜來樹拱

仁義長蕪

沒於邱隴

恆州刺史張府君墓誌

君諱承休字某吳郡人也留侯興漢播美西京長沙徙
吳蔽蔓東土曾祖沖在陳爲文帝師入隋爲漢王學士
祖後翁授經太宗尊之以祭酒旣封新野又贈以宗伯
考少師位不充量止於朱陽宰班固稱世名忠孝魏武
爲積善之家昌門一系暉我諸族君受天戩穀傳家業
藝希言敦行去華崇實非法不由非禮不動精於物理
敏於政事初以南郊齋郎補兗州兵曹丁太夫人憂廬
墓三年加人一等再任始州司倉應入科舉改鄭州錄
事參軍又舉賢良方正遷揚州司錄參軍移蘇州常熟
令歷政皆有能名加朝散大夫入爲司農丞實掌錢穀

五三
姦仇息望使覆囚嶺南是司獄訟聽折惟允迺授濟源
令風行畿甸河潤洛師加朝議大夫上柱國拜隆州司
馬轉恆州長史簡而有孚權而有中道嬰風恙去職就
醫還京春秋六十有二終於頌政里夫人成紀郡天水
秦氏廬陵郡公行師之孫嗣公遊福之女敬事君子訓
成諸孤當代之孟母也年六十二終於許州開元九年
十月某日合葬於武功之禮讓原禮也夫道大難合仕
屯而不進德高有後身沒而福流君同生八人半服銀
艾祚增五子率爲珪璋比迹於燉煌六龍南鄭千室德
門濟美信有徵乎懼陵谷或遷乃勒銘沈石銘曰

思文留侯

時惟皇祖

長沙南守

分韓東土

家有道書 門傳相府 鬼竄重世 通經二主

誕靈上哲 克廣斯文 造次仁義 優游典墳

孝平事親 忠乎事君 猗邨叔父 亦足有云

馮潘州墓誌

公諱君衡字正平廣管高州人也昔畢萬苗裔邑于馮城因以爲氏其適越者則袁宏過江錄所載長樂馮祖恩之後也遠居避地代爲右族帶甲千人擬四豪之公子田洞百里齊萬戶之封君祖盜持節總管高州都督耿國公葬贈左驍衛大將軍荊州大都督恩命分府爲三州君之三子子智幾高州刺史子智玳恩州刺史猶子子游潘州刺史公荊州之孫恩州之子量包山海氣

逸風雲陰德以濟物力行以游道散岸從心乘化而沒
斯實一方超邁全真之士也夫人南海郡太夫人麥氏
誕嫜勳門作嬪傑室初執翼妻之禮終抗梁室之行卽
大將軍宿國猛公鐵杖之曾孫女也夫人有三子一女
同歸上京長子元璣左衛中候次子元珪左領軍衛郎
將少子力士右監門衛大將軍少養於高氏故舉家從
其姓焉夫德厚者福長先否者終泰天之報應豈虛也
哉大將軍所以雲漢奮飛忠孝至感迎聖善於炎海展
三牲之色養拔友于於荒徼會四鳥之嚶鳴縉紳美談
簪紱傾慕是知敬仲羈旅將育于齊孟軻儒藝成名此
母信瑰才之特達亦餘慶之助成乎夫人享年八十有

七開元十七年五月十二日薨於西京來庭里粵以八月二十二日安厝于長樂原之新城憫將軍之純至嘉先士之晦名恩詔追贈潘州刺史招魂而合葬焉蓋殊常之禮若夫慈以遺後孝以揚親忠能合聖惠足昭仁嗟乎馮氏之子具此四德鏤石垂文爲不朽矣銘曰

潘州違世 滅迹沈彩 詔贈本邦 光燦南海

其孤永慕 昊天不逮 夫人處順 奄背榮膺

悲離兩鄉 魂台雙櫬 孝心可贈 百年匪悵

天日蒼蒼 邱隴茫茫 地名長樂 人樂無長

郭門之外 愁生白楊

贈郎將葛君墓誌

公諱威德字某葛氏本梁國甯陵人也因徙遷今居京兆涇陽縣父寶未仕早世公室無陶白之資朝無金張之援不承過庭之訓不漸鼓篋之術而能奮飛喬木獨拔深濟富忠孝而揚己善射馭而聞天早以武藝妙選供奉每扈遊別館侍蹕禁林何嘗不左發五豝傍連雙兔歲久拜元城府左果毅都尉尋加上柱國入陪內仗思馬斯才出典外軍握兵之要所謂白珪特達青雲自致者也其用未展其生有涯神功二年某月日終於東都私第殯北邙山之原夫人太原郡太夫人郭氏從夫有禮以子而貴開元八年十一月薨于京兆之修真里有子福順克家用孝開國惟忠泣風樹之無追痛榮祿

之不逮哀戚之情上感節終之澤下流窀穸有期祖塋將設有詔贈右驍衛郎將開元九年二月七日合葬於長安縣龍首鄉禮也鬱鬱宰樹蒼蒼墓田恐佳城之見日祕銘石於重泉詞曰

都尉武達 夫人禮封 令德高行 譽偶名雙

自古迄今 仁賢同盡 唯傳忠孝 餘慶不泯

四門助教尹先生墓誌

先生諱守貞天水冀人蓋好學博古者也本乎官族稱爲尹氏昔有伊佚司周太史暨乃吉甫勤於宣王格言大勳布在詩傳遠祖緯魏僕射曾祖欣隋開府大父珍唐棣州蒲臺令父文唐通州三岡令先生積德餘慶天

錫純嘏愿而克恭情與禮合七歲誦三雅能通書契訓
詁之義識草木鳥獸之名十五誦三禮能明君臣父子
之道定郊廟吉凶之制二十誦春秋尙書能精五行九
疇之數斷褒貶會盟之節二十五誦詩及易能辨政雅
頌之始極變化生生之至又能誦古史百家之書善文
章草隸之則恥夫流俗背實響聲飾華褻末故每外和
內厲元元本本學者如斯不舍晝夜垂拱四年以明經
高第遂授大成自延載之後條限賓薦長安之初大開
貢舉考功是歲千五百餘人召先生課覈淑慝時稱無
滯學矣天子聞其進通經術乃下制曰成均大成尹守
貞業隆時習功宣日就既有勵於分陰俾參榮於上席

可四門助教誥誥青衿有所仰矣長安二年六月十日
晝寢忽夢麟臺兩局爭召修文覺而歎曰十二日稷吾
當往矣因命親族序訣至日安枕俟期俄然而卒春秋
四十可謂古之達化知命者也嗚呼天與之德而不永
其年天與之才而不大其位何乎粵七月十七日葬於
高陽原先君之舊塋銘曰

尹氏之子

其殆庶幾

爲仁由己

三月不違

謙成德柄

學也身基

辟雍洋洋

可以療飢

環林之下

可以棲遲

我實道貴

人言位微

修文地下

前哲同歸

子之知命

將歿先期

朝衣東首

精魄高飛

人之云亡

胡不棲而

高陽之原 有隄其側 郭門直視 松柏一色

邱隴纍纍 阡陌誰識 浮焉休焉 爲我心惻

④州司戶上柱國呂君墓誌

公諱虔字某其先東平人也堯之太嶽始封呂侯周之太師實表齊國河西則霸王繼代關東則丞相聯華近徙河間是稱右族大父贊隋幽州都督府長史考師滄州青池令並振羽儀馳聲郡邑公孝悌天至禮樂混成千里聞騏驥之才五都重琅玕之價壯士行去樹勳於塞垣君子居之何陋於蕃郡以上柱國爲④州司戶參軍積善襲於家風餘慶流於身後享年若干而卒夫人河清縣太君傅氏四德爰備六行聿脩始則賓於冀妻

終乃訓成孟母春秋若干而終開元十四年某月合葬於州城西南里之平原禮也我有令子職司馬於小山我有淑孫偶乘龍於大樹榮哀之事于茲畢矣銘曰

堂堂呂公 休有令德 穆穆傅母 順我內則

兩譽齊振 雙儀不忒 景行山東 風流河北

有生必謝 誰能獨存 神甯故里 合葬平原

劍暗泉室 松寒墓門 勒銘沈礎 萬古何言

徐氏子墓誌

徐氏子者名巖字某司封員外郎堅之第四子也驥子睨雲鳳毛詵日孝友因性聰敏若神置在膝前已會星辰之氣戲於牀下能記賓主之詞及總角成童精意好

學聞一知十升堂觀奧下筆成章而倫要發言爲論而卓詭識者咸謂增世構之崇蘊益源流之洪潤雖甘茂之孫十二飛辯班彪之子九歲能文不尙之也天乎何辜顏傾無命年十有三歲大足元年九月遭疾而沒嗚呼哀哉凋月始生不見其盈瓊枝方秀不見其茂悲哉

銘曰

生口何淺 死路何深 珠碎朏月 花殘稚林
哀哀父母 孰處其心

鳳閣尹舍人墓誌

附子曲阿令銘

峩峩尹氏 太古之始 發源堯師 中葉周卿
爰暨初考 咸有頌聲 猗歟府君 代烈增盛

孝行之本 謙德之柄 耽樂道真 含光無競
三典郡土 五行以正 再司府丞 百工興詠
茫茫大造 物生遂性 虛無宰之 孰能力爭
位不充德 優游天命 身沒道存 同符孔聖
是有才子 克成餘慶

子曲阿令銘曰

存爲神鑑 歿爲國殤 惟呂惟子 同歸義方

司屬主簿博陵崔訥妻劉氏墓誌

夫人劉氏其先彭城人也隋毗陵郡通守子將之曾孫
唐滁州刺史德祖之孫汾州刺史延嗣之女也昔武子
處秦厥初令氏元王國楚是焉昌族盛德之門龍驥接

彩世祿之胄龜虎聯華夫人璇室載蘭蕙林增秀啗啗
黃鳥豔豔清明聞詩聞禮竊比諸生茂行淵心實稱士
女及鳳飛啟繇夫婦盡琴瑟之和雞鳴咸纒舅姑移喬
梓之敬友愛洽乎妯嬪任恤周乎姻戚豈惟禮備澄幕
工深機杼固已能循法度宜其室家矣年若干以大足
元年七月某日寢疾而卒粵二十九日某辰假葬於某
里夫國喪賢嬪家亡淑媛母氏垂白殯奪所懷稚子始
孩翦焉無倚嗚呼天道輔仁人道與順眷茲大德不遐
三壽何哉報應之理豈神食其言脩短之期將事歸於
命外姻畢萃累歎不足夫人卽吾姨也今薄譔素履永
刊幽石圖史之外有美存焉其銘曰

結一廬朱氏賸餘叢書

崔實齊胄

劉亦漢宗

崇其顯媾

望偶族雙

闔闈是穆

饋奠斯恭

貞歌浮漢

孝室洞江

珪璋其節

桃李其容

宜享偕老

胡簡鞠凶

朝雉飛陌

春蘿墜松

夫傷子慕

去此何從

百歲之後

魂兮合封

張說之文集卷第二十二

張說之文集卷第二十三

雜著

弔陳司馬書

弔國殤文

赤帝壇祈雨文

祭城隍文

祭城門文

祭江祈晴文

賽江文

祭殷仲堪羊叔子文

祭霍山文

祭崔侍郎文

祭陸冀州文

祭石嶺戰亡兵士文

祭石嶺沒陷士女文

爲人作祭弟文 二篇

爲作祭舅文

祭和靜主文

爲高力士祭父文

爲妓人祭故主文

甲陳司馬書

正月癸亥孤子范陽張說頓首頓首陳君之靈頓伏苦
蓋遠辱慰疏執對號慟次於展洩來使未還傳君遇禍
盡哀寢外傷心痛骨明府兄毓德南邦飛聲中夏急人
之急憂人之憂勇於履危果於從政入使天闕有專對
之美按俗交州見澄清之節故得振衣衡管割錦閩鄉
越嶂舊風人狃輕剽振之以○俗格之以華章矯枉過
中斯害也已齒由剛折膏爲明銷嗚呼陳君姪直而殞
皇天輔德問之何故疇昔炎海契闊周旋義則友朋恩
結兄弟方期歲暮○相榮○髮未華何圖零落山濤
猶在嵇紹不孤逝者有知當昭是意今返防關力報前

書幽明雖異交友無改悲言下筆涕泗從之并往千錢
俾陳奠酌獻歛萬里哀哉奈何說頓首再拜

弔國殤文

北伐兮東胡邈遼陽兮孤竹偏師兮覆眾在崇山兮峽
谷露芘芘兮蔓草風綦綦兮拱木見馬血兮夜燃聞殤
魂兮兩哭君王按金鼓而氣憤撫珠鈴而淚滋橫萬里
兮抽恨弔羣山而寫悲懟凶將兮我辱悼勇夫之被纍
彼前鑿兮未遠何後來兮不追對死地兮出陣臨傷門
兮用師軍奪帥兮虹食壘車脫輻兮火焚旗有樂麤兮
愎矣無范宣兮媿之命窮迫兮短兵錯虜迎刃兮血染
鏑旋殘潰兮棄組練山猶號兮谷餘戰殪原野兮奈何

遑君親兮不見於戲何天命之奄忽俾仁義之禮兵爲
蠻夷之俘骨骸六校之飛將闡五營之勁卒吾見出兮
不歸噫名存兮身沒

奉敕赤帝壇祈雨文

維開元十年歲次壬戌四月壬申朔十四日乙酉會臣
侍中源乾曜中書令張嘉貞兵部尙書張說謹以清酌
昭告于赤帝自冬涉春至茲夏首宿麥將秀時雨未洽
皇帝降服減膳避正廢懸恐害衆盛是憂黎庶仁旨之
勤已極兆人之感未通何辜于天而此不惠會臣乾曜
等同力聖日無敢怠荒薄才糝政多所不及神則不雨
或此之由內訟愜惶莫知啟處會臣等若上無補袞下

不利人妨功害能負恩竊位惟神臨照簡擇其心降禍厥身墜祿殞命三臣當咎足謝天責萬姓何辜俾失農望今因夏享展禮既終上抒聖衷懇祈人命至誠必感伋流嘉液旨酒獻誠神其尙饗

祭城隍文

維大唐開元五年歲次丁巳四月庚午朔二十日己丑
荊州大都督府長史上柱國燕國公說謹以庶羞之奠
昭告于城隍之神山澤以通氣爲靈城隍以積陰爲德
致和產物助天育人人之仰恩是關祀典說恭承朝命
綱紀南邦式崇薦禮以展勤敬庶降福四毗登我百穀
猛獸不搏毒蟲不噬精誠或通昭鑒非遠尙饗

祭城門文

維大唐開元五年荊州大都督府長史上柱國燕國公
說謹遣議郎行錄事參軍皇甫暉敢昭告于大府城門
天有三光地有五行陰陽順序庶物以生霖雨過旬晦
昧不晴奈何以陰賊陽以蒙蔽明恐害嘉穀無奉案盛
維爾崇墉本人所營積陰攸處德在助成苟人是利亦
神之臧速收雲雨以復天常報爾特豚薦爾馨香謹以
清酌脯醢式陳祭事尙饗

祭江祈晴文

滔滔大江南國之紀協靈通氣降福禦災是載方冊代
存祀典歲維季秋苗稼大熟霖雨猥集農夫未收油油

杭稻垂生芽葉上則神威將廢下則人心何仰公私憂
窘靡禱不周訴爾明靈撤此雲雨欽儲牲幣俟答神休
謹以清酌脯醢敬崇禋請

賽江文

年月日具官某昭告于大江之神王有百谷禮尊四瀆
善利維神朝海作賓發源岷山駕福來臻率此荆土明
靈是主已成嘉穀垂敗霖雨聽我虔祈福我農畝旣曠
旣穫旣場旣庾欣欣眾心顧答神祐潔牲明酌寅奠江
浦

祭殷仲堪羊叔子文

荊州府城中西北隅舊有殷仲堪祠某到官廣其堂立

羊叔子像廟成而祭之

維年月日燕國公某敢告晉羊殷二荊州之神我聞立人之道曰仁與義仁者孝之先義者忠之主殷公爲孝子羊公爲忠臣行植晉國德施荆人不孤其美是建爲鄰雙鳳雖舊二廟維新凡百君子高山仰止馨香以時敬恭明祀尙饗

祭霍山文

長安二年月日皇帝使并州道大行軍副大總管尹元凱等敬薦清醑敢告霍山之神皇帝天覆萬物各遂其性祠于羣神罔不咸秩獨彼凶虜默啜悖天虐人窺邊猾夏略無甯歲皇帝哀此黎獻勤於征役憫彼夷落毒

於昏暴常欲誅其魁首安是藩毗寇虐盈稔神人同稟
今日送死并朔驚近山陵命將出師龔行天罰惟神炳
靈參野作鎮冀方畝是正直贊揚威武俾胡馬化爲沙
蟲王師眾於草木獻捷之日昭報神休尙饗

祭崔侍郎文

維神龍三年月日兵部郎中員外曹良史等謹以清酌
少牢之奠敬祭故侍郎崔公之靈位以行成名以才起
天臨明代是生君子長戟高門層堂峻陟友孝仁愛衣
冠標軌清通正直省閣條理束帶立朝惟國之俊抑揚
吐納金聲玉振器不滯方神無留韻厚奉外不爲假坦
率內不違眞汎交而容博好施而能均欲人規己恕己

及人故者不違其故親者不失其親歷否泰能全其節
故令名不離其身方齊六相助明三辰何孤我德何負
茲神搏空落羽中駕摧輪昔時寮列今爲弔賓凡二三
子夙承遊眷聯務七兵歲陽三變分與時積事由更練
蹇蹇公庭申申私宴慟音徽之永掩懷舊範之不見哉
容止於綴足潛眉目於蒙面哀哉奈何涕零如霰緬惟
初疾以迄將亡意氣精爽乾乾自強顧瞻賓客勉勉矜
莊几不側弁衮無解裳話言靜密憂公不忘猶看駿馬
尙聽名倡靡神不禱靡藥不嘗倏焉信宿俄歸眇茫茫歲
初置酒春中酌觴何吉凶之共域同歌哭於此堂自古
及今人誰不沒豈歎生死所嗟倉卒脩途未半壯志先

伐斃子亂年遺脩數月在親親與懷舊孰不傷心而痛
骨虛奠易收深悲難歇尙饗

爲河內王作祭陸冀州文

維萬歲通天元年月日神兵道大總管河北道按撫使
右金吾衛大將軍河內郡王以少牢之奠致祭故冀州
刺史陸君之靈戎羯不道侵軼幽都凶渠殄滅餘燎星
鋪鳴弓射柳飲馬長蘆攬集同惡難起無虞梟獍爲旅
鯨鯢有族裳旗未兵剡荻弦木泮渙吞噬睢盱觸逐亂
舞梯衝潛攻版築鑿齒爭厲熊蹯未孰踰垣自潰守陴
皆哭高扃已陷連樓復焚人類雜草城隨壞雲僵屍暴
骨藉藉紛紛嗟嗟使君死節無恡政寬成俗兵機不振

狡爾猖狂難以德鎮城爲讐保身膏虜刃明明上帝仁
覆憫下赫赫神兵驅馳在野朝告夕赴如何不及將守
非堅爲寇是急救兵適來涉血猶溼三軍雷歎百城雨
泣天子命我董戎冀方旌旗介冑千里相望旣掃氛濁
言巡戰場輯穆人吏撫甯孤孀徘徊城府悽愴甘棠禮
重王事哀深國殤魂兮有感歆此嘉嘗

爲魏元忠作祭石嶺戰亡兵士文

維長安二年月日敕魏元忠以酒脯時果之奠致祭于
石嶺戰亡兵士之靈戎羯慢天南牧吠主石嶺橫地北
都肩戶興我王卒保界并土如何不弔罹此寇虜列鎮
旣嚴連巖旣削攻則路險守非城惡彼謀匪臧實愆借

作援絕兵滅軍孤勢弱地拒兩陁山望雙嶠胡塵大起
白刃交錯石盡矢窮旗焚胄落嗟爾戰夫烈烈忠勇奮
不顧命志無旋踵身沒名揚生輕義重天子命我理兵
晉陽思與士眾底靈遐荒痛茲壯士翦爲國殤盍訴天
帝降厲鬼方助氣金鼓復怨沙場虜血爾酌虜醢爾嘗
封屍死所招魂故鄉尙饗

爲魏元忠作祭石嶺沒陷士女文

維長安二年月日朔敕以酒脯時果之奠致祭石嶺死
喪百姓之靈北胡自擅賊虐不道氣捍朔風馬肥秋草
侵軼郡縣驚逼稚老奔走山林是障是保兵不善守將
不遠謀如何滅竈無復燒牛俾爾士女燬於寇讐魂飛

狄刃血迸羶裘殤悲雨哭氣怨天愁總兵帝鄉言念北
阜抗憤戎漠傷心按部泣弔郊童哀問田叟爲爾復惡
誓滅羣醜蹴蹋蘭山脂膏葦藪誠若克就沒亦不朽慰
爾眾靈酌此簞酒尙饗

爲人作祭弟文

維景龍元年月日朔從兄兵部尙書某以清酌少牢之
奠致祭於故將軍弟之靈欽若貽宴俾降戢穀神祚玉
衣天開金屋絲系溢寵諸宗橫福覩交泰之二儀承序
殷之九族引同本於條榦合分流於昭穆義有感而意
深恩無方而情篤況山慕喬頂林晞秀木深仁遠愛俟
子能復何從才之有餘而輔德之不足舉朝野而皆痛

在密愛而尤酷嗚呼哀哉永懷令弟言念生平蘭華雪
豔玉潤珠清禮樂縣解文章挺生三篋暗記千門畫成
風流望美月旦傾聲掌北軍之師律首東觀之詞英偉
壯夫之獻頌善仁者之論兵睠新豐而臨幸繞湯井而
連營乃奉車之暴逝忽復綬而凶行軫天悲於宸掖固
聚族於華京惠連詩夢子敬琴情倘昭昭之不泯知親
親之素誠嗚呼哀哉尙饗

爲人作祭弟文

維年月日兄某致祭亡弟尙書之靈天實喪予不憇遺
善家殞玉樹國墜寶臣嗚呼執柔何痛之甚嗟予與爾
夙遭閔凶哀惇相鞠殆及長成爾性岐實穎德表宣慈

居盡友悌之心言必忠貞之事縣縣我族俟子而大奉
祖德之令圖荷朝戚之惠渥白首相對紫綬雙紆爾旣
秉國鈞旣敷朝典出牧千里入宰六官予聞爾言嘗誠
過寵余嘉爾行在貴能卑清淨温恭每希於上士飲食
車馬不越於平人每思與爾歸印東都懸輿故里揚名
講德居常待終當謂老夫沒於汝手不圖令弟殞自我
先及爾纏痾屬予伏枕不見數日長悲九泉嗚呼刊述
未成平生已盡髮膚猶在魂魄焉知聞爾屬纊之辰託
予身外之事薄葬之禮還從爾心宇孤之情不待遺意
所恨在疾不視於喪不臨沈縣苦懷纏迫斯甚予羸老
矣傷心幾何人琴兩亡命也命也

爲鄭虛已作祭舅文

維年月日外甥虛已謹以清酌少牢之奠敬祭於故汴州司馬四舅之靈覺積周親天禍外氏仁舅捐館靈輶祖庭四海喪其範儀九族失其陰潤感今循昔觸緒增悲恭惟先門逮舅平日淵流莫逆道術同歸穆齊鄭之累姻深言孫之至友及鞠凶之際創巨失圖賜厚獲葬之恩事優含哺之育顧省全立功歸撫惠竊荷濟於百罹思效過於一等豈期德素積而力莫醜願未申而禍先集不孤之託緬爾何依猶父之心忽焉罔報冥昧靡覲存亡永違執饋奉酌五牲含塞幽靈昭察當歆宿誠

祭和靜縣主文

維年月日敬祭薛氏太夫人和靜縣主之靈惟夫人軒
庭繁祉羸臺茂淑承訓公宮宜家卿族博士學藝尙書
題目法度蘋蘩儀刑松菊夫拜中令昔同鮑婦子昇瑣
闥今類馮母舉按如賓闔門誠友在貴能降居貧施厚
大道初革王風變韶維城落構若木疏條欽聞積善智
洽仁昭克庇二族命服兩朝肅肅柔和如風是暢娥娥
女師如月斯望潘輿獻壽仲祿方養不弔昊天何德之
喪嗚呼哀哉洛邑啟殯長安歸陌哭慟高臺旌懸舊宅
階溼夜露庭陰曉魄嗟我外姻俱成弔客

爲將軍高力士祭父文

維開元十七年月日孝子力士敢告于考潘州府君妣

南海太君之靈小子不天夙齡閔凶身嬰寇剽家值虜裂幸供灑掃之餘遂蒙侍從之顧扶戴明聖逼畏艱難大固不敢不密小亦不敢不誠事必記心言無漏口日慎一日將二十年玉弁加首金章在佩先靈納祐神明降鑿阿母遠至於京華妹兄自拔於泥滓咸以官漸榮祿姻通士林慈顏顧復於目前同氣展歡於膝下又緣幼育高氏變族移家敬愛盡於二堂溫清周於一紀不圖無狀招禍永見孤棄聖主恩華曲逮存沒邑封舊郡官贈本邦親感恩澤子承父意致命報天誓有同於皦日竭忠資孝志無忝於幽泉敬惟靈懷慰聞昭遂先遠有日卜兆新塋遙啟尊魂合祔良壤哀迫祖載攀戀須

與謹以清酌少牢恭陳遣奠盈尊不舉虛饌莫嘗號天叩地殞絕何仰

爲妓人祭故主文

維年月日故妓人伏十善謹以清酌少牢之奠致祭于元十郎之靈渌流茂樹萍蘿是依山崩川竭魚鳥何歸恭惟主君高才達節賞心樂事風流不絕歌豔露華舞迴春雪幸持此技承君餘悅綺羅脂粉嬌上春自言終世寶情親甯知一旦君恩斷繁絃清管爲何人懷主君之一願願徇命於九原迫夫人之嚴旨遂投足於他門生有十年之愛沒無一日之恩雖強容飾於新奉心摧絕而不敢言君子廣德仁心必徧疇昔與君琴尊歡宴

永懷蕙歎俯憐荼苦錫以時珍申哀故宇斷車旣展祖
莫斯開悲歌助挽長袖乘杯平居好此魂來不來心思
往而莫遂足欲返而遲迴終天地於此訣毒煩冤而難
裁

張說之文集卷第二十三

張說之文集卷第二十四

表

請不從靈駕表

奏慶山醴泉表

奏瑞禾杏表

賀峒山表

羊乳麇表

爲留守奉嘉禾表

建安王奏失利表

謝賜衣及藥表

爲建安王讓官表

爲薛稷讓官表

爲郭振讓官表

爲僧辭公封表

百官請不從靈駕表

臣某等言伏以靈駕首途聖思攀從國計非便羣情不
安冒昧上祈未蒙哀允跪拜還旨載深惶惕臣某等誠

惶誠恐頓首頓首死罪臣聞古者天子上法天心下極私情不違眾欲以順人理國爲孝以克己制心爲禮是故凡聖異禮公私殊制私心獨展凡人之孝萬姓感善聖人之孝也陛下行堯舜之事以萬姓爲心奈何守曾閔之節懷獨展之願臣等囂囂竊所未曉且永_○_○以後關輔流散近適旋定人猶未足今山陵起築役徒總萃彌春涉夏爲費_○多若陛下此行羣司畢從於人取給臣實難之水旱小愆農慮非淺東都則水漕淮海易資鹽穀之蕃陸走幽并近壓戎夷之便朝命新復人望在安宜應靜鎮未可移動陛下若俯順羣願留撫都人則其安若此如不勝私情攀奉靈駕則其慮如彼況扈從